

四庫全書

史部

欽定四庫全書

史部

歷代名臣奏議卷一百九十七

詳校官編修<sub>臣</sub>周瓊

編修<sub>臣</sub>裴謙覆勘

總校官編修<sub>臣</sub>王燕緒

校對官編修<sub>臣</sub>沈清藻

謄錄監生<sub>臣</sub>蔡枝華

欽定四庫全書

歷代名臣奏議卷一百九十七

明 楊士奇等 撰

謹名器

周襄王三年叔帶與戎翟謀伐襄王襄王欲誅叔帶叔帶奔齊齊桓公使管仲平戎于周使隰朋平戎于晉王以上卿禮管仲管仲辭曰臣賤有司也有天子之二守國高在若節春秋來承王命何以禮焉陪臣敢辭王曰

舅氏余嘉乃勲毋逆朕命管仲卒受下卿之禮而還

東漢順帝漢安中梁冀子弟五人及中常侍等以無功  
並封大司農杜喬上書諫曰陛下越從藩臣龍飛即位  
天人屬心萬邦攸賴不急忠賢之禮而先左右之封傷  
善害德興長佞諛臣聞古之明君褒罰必以功過末世  
闇主誅賞各緣其私今梁氏一門宦者微孽並帶無功  
之綬裂勞臣之土其為乖濫胡可勝言夫有功不賞為  
善失其望姦回不詰為惡肆其凶故陳資斧而人靡畏

班爵位而物無勸苟遂斯道豈伊傷政為亂而已喪身  
亡國可不慎哉書奏不省

桓帝延熹七年南巡園陵特詔太尉楊秉從及行至南  
陽左右並通姦利詔書多所除拜秉上疏諫曰臣聞先王  
建國順天制官太微積星名為郎位入奉宿衛出牧百  
姓臯陶誠虞在於官人頃者道路拜除恩加豎隸爵以  
貨成化由此敗所以俗夫巷議白駒遠逝穆穆清朝遠  
近莫觀宜割不忍之恩以斷求欲之路於是詔除乃止

桓帝時封賞踰制內寵猥盛光祿勳陳蕃乃上疏諫曰  
臣聞有事社稷者社稷是為有事人君者容悅是為今  
臣蒙恩聖朝備位九列見非不諫則容悅也夫諸侯  
上象四七垂耀在天下應分土藩屏上國高祖之約非  
功臣不侯而聞追錄河南尹鄧萬世父遵之微功更爵  
尚書令黃雋先人之絕封近習以非義授邑左右以無  
功傳賞授位不料其任裂土莫紀其功至乃一門之內  
侯者數人故緯象失度陰陽謬序稼用不成民用不康

臣知封事已行言之無及誠欲陛下因是而止又比  
年收斂十傷五六萬人饑寒不聊生活而采女數千食  
肉衣綺脂油粉黛不可貲計鄙諺言盜不過五女門以  
女貧家也今後宮之女豈不貧國乎是以傾宮嫁而天  
下化楚女悲而西宮災且聚而不御必生憂悲之感以  
致并隔水旱之困夫獄以禁止姦違官以稱才理物若  
法虧於平官失其人則王道有缺而今天下之論皆謂  
獄由怨起爵以賄成夫不有臭穢則蒼蠅不飛陛下宜

採求得失擇從忠善凡一選舉委尚書三公使寢責誅賞各有所歸豈不幸甚帝頗納其言為出宮女五百餘人但賜僑爵關內侯而萬世南鄉侯

靈帝時尚書令陽球奏罷鴻都文學曰伏承有詔勅中尚方為鴻都文學樂松江覽等三十二人圖象立贊以勸學者臣聞傳曰君舉必書書而不法後嗣何觀案松江覽等皆出於微蔑斗筭小人依憑世戚附託權豪俛眉承睫徼進明時或獻賦一篇或烏篆盈簡而位升郎中



形圖丹青亦有筆不點牘辭不辯心假手請字妖偽百  
品莫不被蒙殊恩蟬蛻滓濁是以有識掩口天下嗟歎  
臣聞圖象之設以昭勸戒欲令人君動鑒得失未聞豎  
子小人詐作文頌而可妄竊天官垂象圖素者也今太  
學東觀足以宣明聖化願罷鴻都之選以消天下之謗  
書奏不省

魏文帝召蔣濟為散騎常侍時有詔賜征南將軍夏侯  
尚曰卿腹心重將特當任使作威作福殺人活人尚以

示濟濟至帝問以所聞見對曰未有他善但見亡國之語耳帝忽然問其故濟具以答因曰作威作福書之明戒天子無戲言惟陛下裁之帝即追取前詔

帝欲追封武宣卞太后父母尚書陳羣奏曰陛下以聖德應運受命創業革制當永為後式案典籍之文無婦人分土命爵之制在禮典婦因夫爵秦違古法漢氏因之非先王之令典也帝曰此議是也其勿施行以作者詔下藏之臺閣永為後式

晉懷帝永嘉末丹陽太守輔國將軍王導上書曰昔魏武達政之主也荀文若功臣之最也封不過亭侯倉舒愛子之寵贈不過別部司馬以此格萬物得不局跡乎今者臨郡不問賢愚豪賤皆加重號輒有鼓蓋動見相準時有不得者或為耻辱天官混雜朝望頽毀導忝荷重任不能崇浚山海而開創亂源號食竊名位取紊彝典謹送鼓蓋加崇之物請從導始庶令雅俗區別羣望無惑

成帝以保母周氏有阿保之勞欲假其名號內外皆奉詔侍中顧和獨上疏以為周保祐聖躬未遺其勳第舍供給擬於戚屬恩澤所加已為過隆若假名號記籍未見明比惟漢靈帝以乳母趙嬈為平氏君此末代之私恩非先代之令典且君舉必書將軌物垂則書而不法後嗣何觀帝從之

宋孝武帝時江夏王義恭與驃騎大將軍竟陵王誕奏曰臣聞佾懸有數等級異儀珮笏有制卑高殊序斯蓋

上哲之洪模範世之明訓而時至彌留物無不弊僭侈  
由俗軌度非古晉代東徒舊法淪落侯牧典章稍與事  
廣名實一差難以卒變章服宗濫多歷年所今樞機更  
造皇風載新耗弊未充百用思約宜備品式之律以定  
損厭之條臣等地居枝昵位參台輔遵正之首請以爵  
先致貶之端宜從戚始輒因暇日共參愚懷應加省易  
謹陳九事雖懼匪忠庶竭微欵伏願陛下聽覽之餘薄  
垂昭納則上下相安表裏和穆矣詔付外詳有司奏曰

車服以庸虞書茂典名器慎假春秋明誠是以尚方所制漢有嚴律諸侯竊服雖親必罪降于頃世下僭滋極器服裝飾樂舞音容通于王公達于衆庶上下無辨民志靡一義恭所陳實允禮度九條之格猶有未盡謹共附益凡二十四條詔可

後魏孝文帝初即位將遷顯祖神主于太廟有司奏舊事廟中執事之官例皆賜爵今宜依舊詔百寮評議羣臣咸以為宜依舊事祕書令程駿獨以為不可表曰臣

聞名器為帝王所貴山河為區夏之重是以漢祖有約  
非功不侯必當屬有命於大君之辰展心力於戰謀之  
日然後可以應茅土之錫未見預事於宗廟而獲賞於  
疆土徒見晉鄭之后以夾輔為至勲吳鄧之儔以征伐  
為重績周漢既無文於遠代魏晉亦靡記於往年自皇  
道開符乾業創統務高三五之規思隆百王之軌罰頗  
減古賞實增昔時因神主改祔清廟致肅而授群司以  
九品之命顯執事以五等之名雖復帝王制作弗相沿

龍衣然當時恩澤豈足為長世之軌乎乖衆之愆伏待罪  
謹書奏從之

宣武帝時天大旱司徒高肇擅錄囚徒欲以收衆心清  
河王懌言於帝曰昔季氏旅於泰山孔子疾之誠以君  
臣之分宜防微杜漸不可瀆也減膳錄囚乃陛下之事  
今司徒行之豈人臣之義乎明君失之於上姦臣竊之  
於下禍亂之基於此在矣帝遂詔尚書與羣司鞠理獄

訟



明帝時太后父司徒胡國珍薨議贈相國大上秦公諫  
議大夫張普惠力陳其不可會聞胡家穿墻下墳有磐  
石乃密表曰臣聞優名寶位王者之所光錫尊君愛親  
臣子所以慎終必使勲績相伴號秩相可然後能顯揚  
當時傳徽萬代者矣竊見故侍中司徒胡公懷道含靈  
實誕聖后載育至尊母儀四海近樞克唯允之寄居槐  
體論道之明故以功餘九錫褒假鑿鑿深聖上之加隆  
極慈后之至愛憲章天下不亦可乎而太上之號竊謂

未衷何者易稱天尊地卑乾坤定矣故曰大哉乾元又  
曰至哉坤元明乾坤不可並大禮記曰天無二日土無  
二王嘗禘郊社尊無二上明君臣不可並上伏見詔書  
以司徒為太上秦公夫人為太上秦君夫人蒙號於前  
司徒繫之於後尊光之美盛矣竊惟高祖受禪於獻文  
皇帝故仰尊為太上皇此因上上而生名也皇太后稱  
令以繫勅下蓋取三從之道遠同文母列於十亂則司  
徒之為太上恐乖繫勅之意春秋傳曰葬稱公子辭明

不可復加上也書曰茲予大享于先王爾祖其從與享  
之司徒位尊屬重必當配享先朝若稱太上以為臣以  
事太上皇恐非司徒翼翼之心漢祖創有天下尊父曰  
太上皇母曰昭靈后乃帝者之事晉有小子侯尚曰僭  
之於天子司徒三公也其可同號於帝乎孔子曰必也  
正名乎名不正則言不順言不順則事不成事不成則  
禮樂不興禮樂不興則刑罰不中刑罰不中則民無所  
措手足易曰有大者不可以盈故受之以謙謙尊而光

卑而不可踰天道虧盈而益謙地道變盈而流謙鬼神  
害盈而福謙人道惡盈而好謙又曰困於上者必反於  
下故受之以井比剋卜定兆而以淺改卜羣心悲惋亦  
或天地神靈所以垂至戒啓聖情伏願回日月之明察  
微臣之請停司徒逼同之號從卑下不踰之稱畏困上  
之鑒邀謙光之福則天下幸甚

唐高祖以舞工安叱奴為散騎常侍禮部尚書李綱諫  
曰臣按周禮均工樂胥不得廁於士伍雖復妙如師襄

才如子野皆繼世不易業故魏武使禰衡擊鼓衡先解  
朝衣曰不敢以先王法服為伶人衣齊高緯封曹妙達  
為王以安馬駒開府有國家者可為鑒戒今新造天下  
開太平之基功臣賞未及徧高才猶伏草茅而先令舞  
工鳴玉曳組位五品趨丹地殆非創業垂統貽子孫之  
道也帝不納

太宗貞觀中監察御史馬周上疏曰臣聞致化之道在  
求賢審官孔子曰惟名與器不可以假人是言慎舉之

為重也臣伏見王長通白明達本樂工與阜雜類韋槃  
提斛斯正無它才獨解調馬雖術踰等夷可厚賜金帛  
以富其家今超授高爵與外廷朝會駟豎倡子鳴玉曳  
履臣竊恥之若朝命不可追改尚宜不使在列與士大  
夫為伍也帝善其言

中宗以方士鄭普思為秘書監葉靖能為國子祭酒侍  
中桓彥範執不可帝曰要已用之不可止彥範曰陛下  
始復位制詔軍國皆用貞觀故事貞觀時以魏徵虞世

南顏師古為監以孔穎達為祭酒如普思等方伎猥下  
安足繼蹤前烈臣恐物議謂陛下官不擇才以天秩加  
私愛也

睿宗景雲中柳澤為右率府鎧曹叅軍以中宗時長寧  
宜城安定諸公主及后女弟昭容上官與其母鄭尚宮  
柴隴西夫人趙及姻聯數十族皆能降墨敕授官號斜  
封及姚元宗宋璟輔政白罷斜封官數千員元宗等罷  
去太平公主盡奏復之澤詣闕上疏曰臣聞藥不毒不

可以蠲疾詞不切不可以補過故習甘旨者非攝養之  
方邇諛佞者非治安之宜臣竊見神龍以來綱紀大壞  
內寵專命外嬖制權因貴憑勢賣官鬻爵妃主之門同  
商賈然舉選之署若闐闐然屠販者由邪忝官廢黜者  
因姦冒進天下溷亂幾危社稷賴陛下聰明神武拯溺  
舉墜耳目所親豈可忘鑒誡哉且斜封官者皆僕妾私  
謁迷謬先帝豈盡先帝意邪陛下即位之初用元崇等  
計悉以停廢今又收用之若斜封之人不可棄邪韋月



將燕欽融不應褒贈李多祚鄭克義不容濫雪也陛下  
何不能忍於此而能忍於彼使善惡混并反覆相攻道  
人以非勸人以僻今天下咸稱太平公主與胡僧慧範  
以此誤陛下故語曰姚宋為相邪不如正太平用事正  
不如邪臣恐流近致遠積小為大累微成高勿謂何傷  
其禍將長勿謂何害其禍將大又言尚醫奉御彭君慶  
以巫覡小伎超授三品奈何輕用名器加非其人臣聞  
賞一人而千萬人悅者賞之罰一人而千萬人勸者罰

之惟陛下裁察焉

玄宗時李林甫無學術見中書令張九齡文雅為帝知  
內忌之會范陽節度使張守珪以斬可突于功帝欲以  
為侍中九齡曰宰相代天治物有其人然後授不可以  
功賞國家之敗由官邪也帝曰假其名若何對曰名器  
不可假也有如平東北二陞陛下何以加之遂止又將  
以涼州都督牛仙客為尚書九齡執曰不可尚書古納  
言唐家用舊相不然歷內外貴任妙選有德望者為

之仙客河湟一使典耳使班常伯天下其謂何又欲賜  
實封九齡曰漢法非有功不封唐遵漢法太宗之制也  
邊將積穀帛繕器械適所職耳陛下必賞之金帛可也  
獨不宜裂地以封帝怒曰豈以仙客寒士嫌之邪卿固  
素有門閥哉九齡頓首曰臣荒陬孤生陛下過聽以文  
學用臣仙客擢胥史目不知書韓信淮陰一壯夫羞絳  
灌等列陛下必用仙客臣實恥之帝不悅翌日林甫進  
曰仙客宰相材也乃不堪尚書邪九齡文吏拘古義失

大體帝由是決用仙客不疑

德宗興元中駕幸梁州詔翰林學士陸贄曰朕自發洋州已來累路百姓進獻菓子雖甚微細且有此心今擬各與散試官卿宜商量可否贄上狀曰伏以爵位者天下之公器而國之大柄也惟功勳才德所宜處之非此二途不在賞典恒宜慎惜理不可輕輕用之則是壞其公器而失其大柄也器壞則人將不重柄失則國無所持起端雖微流弊必大緣路所獻瓜果蓋是野人微情

有之不足光聖猷無之不足虧至化量以錢帛為賜足彰行幸之恩饋獻酬官恐非令典帝復令欽淑齋中書所與進瓜菓人擬官狀示贄仍奉宣旨曰朕所到處欲得人心喜悅試官虛名無損於事宰臣已商量進擬與亦無妨贄又奏曰臣愚以謂信賞必罰霸王之資輕爵褻刑衰亂之漸信賞在功無不報必罰在罪無不懲非功而獲爵則爵輕非罪而肆刑則刑褻爵賞刑罰國之大綱一綱或隳萬目皆弛雖有善理未如之何天寶

季年嬖倖傾國爵以情授賞以寵加天下蕩然紀綱始  
紊逆羯乘釁遂亂中原遣戍歲增策勳日廣財賦不足  
以供賜而職官之賞興焉職員不足以容功而散試之  
號行焉青朱雜沓於胥徒金紫普施於輿阜薰蕕無辨  
涇渭不分二紀于茲莫之能整當今所病方在爵輕設  
法貴之猶恐不重若又自棄將何勸人聖旨以為試官  
虛名無損於事臣伏恐陛下思之未熟偶有是言倘或  
謂之信然臣竊以為過矣夫立國之道惟義與權誘人

之方惟名與利名近虛而於教為重利近實而於德為  
輕凡所以裁是非立法制者則存乎其義至於參虛實  
揣輕重並行而不傷迭用而不悖因衆之欲度時之宜  
消息盈虛使人不倦者則存乎其權專實利而不濟之  
以虛則耗匱而物力不給專虛名而不副之以實則誕  
謾而人情不趨故國家之制賞典錫貨財賦秩廩所以  
彰實也差品列異服章所以飾虛也居上者必明其義  
達其變相須以為表裏使人日用而不知則為國之權

得矣謹按命秩之載于甲令者有職事官焉有散官焉有勲官焉有爵號焉雖以類而分其流有四然其掌務而授俸者唯繫於職事之一官以序才能以位賢德此所謂施實利而寓之虛名者也其勲散爵號三者所繫大抵止於服色資蔭而已以馭崇貴以甄功勞此所謂假虛名以佐其實利者也虛實交相養故人不瀆賞輕重互相制故國不廢權今之員外試官頗同勲散爵號雖則授無費祿受不占員然而突銛鋒排患難者則以



是賞之竭筋力展勤効者又以是酬之其為用也可謂重矣今或捧瓜一器挈果一盛亦授試官以酬所獻則彼突銛鋒而竭筋力者必相謂曰吾以忘軀命而獲官此以進瓜菓而獲官是乃國家以吾之軀命同於瓜菓矣瓜菓草木也視人如草木誰復為用哉且員外試官無俸祿之資無攝管之柄無見敬之貴無免役之優唯假虛名以籠浮俗浮俗所以若存若亡而未甚厭棄者徒以上之所惜耳今陛下若又輕用之以為無損於事

人寤斯旨復何賴焉後之立功曷用為賞陛下若欲賞之以職事則官員有限而勲伐無窮固不勝其用矣陛下若欲賞之以貨財則人力已殫而帑藏比曾匱固不充其費矣既未有實利以敦勸又不重虛名而濫施人無藉焉何以為國且植瓜樹果多是野人貧者所資唯在衣食假以冗號亦奚用焉必欲使之歡欣不如厚賞錢帛人不失利國不失權各得所宜兩全其實何有不可固傷大猷願留睿思更少詳度

時又有旨與贄云比在奉天將士並賜名定難功臣令宰臣等商量扈從中官辛苦至甚亦合依例並賜此名朕以南衙朝士之中有經奉天重圍又以卿等昨者奔赴行在涉歷危險亦極艱難今不問中官朝官但經重圍又到山南者並擬賜名定難功臣卿宜商量穩便贄又上奏曰陛下惠霑贄御仁洽庶寮念隨難之憂危恤從巡之勞苦議增寵飾將錫嘉名事雖未行意則已就凡在貴近固知銜恩睿旨淹詳復詢庸賤惟精惟慎允

謂防微顧省何如屬當下問臣若自貪榮號傍懼怨憎  
因循順成不極所見心且知負如天鑒何是以不揆言  
之淺深不計身之利害但輸狂直唯聖所裁臣聞賞以  
懋庸名以彰行賞乖其庸則忠實之效廢名浮於行則  
瀆冒之弊興一足以撓國權一足以亂風俗授受之際  
豈容易哉頃以駐蹕奉天迫於患難竟攘兇逆實賴武  
人遂旌定難之勲特賜功臣之目名頗符實事亦會時  
所需雖多誰曰非允至如宮闈近侍班列具臣雖奔走

恪居各循厥職而驅除翦伐諒匪所任又屬皇輿再遷  
天禍未悔見危無補曷謂功臣致寇方深孰云定難縱  
使遭罹圍逼跋履崎嶇難則當之定將安據勞或有矣  
功其謂何大凡有生之倫莫不各親其類賤彼貴我抑  
惟常情黜異獎同亦是常性臣忝搢紳之列又當受賜  
之科竊自校量猶知不可而况於公議乎况於介冑之  
士乎人之多言靡所不至必謂陛下溺愛近習故徇其  
苟得之情況該羣司以分其私昵之謗怨不在大釁皆

自微必將沮戰士激勵之心結勲臣憤恨之氣所悅者寡所愠者多所與者虛名所失者實事所悅者臣下之謗志所病者國家之大猷利害皎然不為難辨且名者衆之所評也是曰公器亦為爭端覈之至精猶患相軋處或乖當安能勿踰以漢高之制服雄豪太宗之削平區寓天下既定乃論功勲有蕭曹之殊庸有房杜之碩畫戰守經畧倬乎殊倫猶謂豐沛故人刀筆文吏諸將不服頗相訐揚乃至攘袂指天拔劍擊柱偶語謀反誼

謹訟冤矧今國步猶艱王化未洽方資武力以殄寇讎  
蓋非恩倖競進之時文儒角逐之日當功而獎尚恐未  
孚獎又非功固宜見誚儻有節効尤著理當褒崇賞典  
甚多何必在此其餘別無績用例徇驅馳且俟賊平甄

錄非晚

贄為中書侍郎同中書門下平章事時上奏曰右希顏  
奉宣進止萬榮安撫有功聞亦忠義甚得衆心若更淹  
遲却恐事不穩便今商量除一親王充節度使且令萬

榮知留後其節度制便從內出萬榮須與改官卿等即  
商量進來者臣性習懦頑藝識空乏辱當獎任待罪宰  
司事關安危不敢容默雖服戎角力諒匪克堪而經武  
伐謀或有所見夫制置之安危由勢付授之濟否由才  
勢如器焉唯在所置置之險地則覆置之夷地則平材  
如負焉唯在所授授踰其力則踣授當其力則行故負  
重者不可以微劣勝器大者不可以輕易處有巨力而  
加重負猶懼蹙跌之不虞擇安地而寘大器尚慮傾覆



之難備焉有委非所任置非所安而望其不顛不危固亦難矣劉士寧窮兇極暴衆所不容李萬榮因人之心閉城拒逐為國除害亦有可嘉誠宜星夜上聞請擇節將今所陳奏頗涉張皇但露徵求之情殊無退讓之禮據茲鄙操殊異純良又聞本是滑人偏厚當州將士與之相得纔止三千諸營之兵已甚懷怨據此頗僻亦非將材且邀君而力取其位不忠逐帥而謀代其權不義犯此二者而加之非材得志驕盈不悖則敗悖謂犯上

敗謂債軍俱為厲階莫見其可今雖遽加寵命務壓貪  
求曲示保持冀消凶慝然其所行不遜所得無名縱之  
則反側而益疑善之則缺望而肆惡夫善始而克終者  
猶寡況始於不善而求能以義自全者乎又緣嘗自蓄  
謀以危主將及居人上恒恐見圖必於部校之間多有  
疑阻之釁上下猜貳何能久安縱未干紀亂常亦必喪  
師感境所以承前方鎮之任選建才德而不副所委者  
則有矣其不由才德而授終能殿邦固節者未之有也

是猶置器欲安而不擇可安之勢負重欲濟而不量可  
濟之材處非所宜不敗何待陛下若謂臣說體迂濶有  
異軍機引喻乖踈不同事實臣請指陳汴宋一管近代  
成敗之跡皆陛下之所經見者以為殷鑒惟陛下覽而  
察之往者田神功作鎮河南領汴宋徐泗兗鄆曹濮八  
州之地兵食兼足職貢備脩左肅青齊右弭滑魏南控  
淮浙北輔滎瀍殷如長城不震不聳此由制置於可安  
之地付授得可濟之材其為利宜斯謂大矣及神功入

觀邁厲不還先皇帝示眷悼之優崇貪因循之便易知  
神玉才不勝任排衆議而竟授之既而維御無方經畧  
失制權歸豪將勢散列城禍機一興內叛外破委三軍  
於暴帥陷五郡於匪人轉輸所經塗路亟阻此由制置  
於必危之地付授於必躓之才其為敗傷亦已甚矣近  
者劉玄佐驅攘巨猾底復大梁即鎮於茲幾將十載雖  
不能勤身節用以撫疲甿畢力竭誠以揚丕烈然尚號  
令由已部屬畏威緝脩戎旅振耀聲勢遠邇談矚且為

完軍制持秉方猶有所倚及玄佐殂沒朝廷命吳淦代之士寧兇頑輒敢眦睚素非得衆且甚不材緩之旬時必自離沮隨機制馭指顧可平陛下念深黎元姑務容養適使姦徒得計庸豎作狂但肆醜厲之詞豈懷任置之惠運路幾絕生人重殘殷然垣翰之軍鞠為汙染之俗追思致患之本豈不失於苟且哉今若又授萬榮則與士寧何異負立而取誰曰不然邀取而除孰為非據苟邀則不順苟允則不誠君臣之間勢必嫌阻與其圖

之於滋蔓不若絕之於萌芽忘久遠而樂因循固非英  
主御天下長筭遠慮之計也且為國之道以義訓人將  
教事君先令順長用能弭爭奪之禍絕窺覲之心聖人  
所以興敬讓而服暴強禮達而分定故也假使士寧為  
將慢上虐人萬榮懷奉國之誠稟嫉惡之性棄而遠之  
斯可矣討而逐之亦可矣謀其帥而篡其位則不可焉  
何者方鎮之臣事多專制欲加之罪誰則無辭若使傾  
奪之徒便得代居其任利之所在人各有心此源潛滋

禍必難救非獨長亂之道亦開謀逆之端四方諸侯誰  
不解體得一夫而喪羣帥其何利之有焉矧茲一夫猶  
未可保徒亂風教以生人心昨者所逐士寧蓋起於倉  
卒諸郡守將固非連謀一城師人亦未協志況又待之  
不一撫之不均黨助萬榮其能有幾仍各計度於成敗  
之勢迴違於逆順之名安肯捐軀與之同惡今所以未  
即變者皆為萬榮所誘許其賞給貨財且相服從以候  
制旨陛下但於文武羣臣之內選一和惠寬敏素為軍

旅所愛信者命為節度仍降優詔慰勞彼軍獎萬榮以撫定之功別加寵任褒將士以輯睦之義厚賜資裝衆知保安人且懷惠舍此助亂更將何求揆其大情理必寧息萬榮縱欲跋扈勢何能為三軍既自離心列城又不為援緣其迫逐主將諸道必復憎嫌邇無所親遠無所與不勞天討必自殲夷陛下何所為虞而欲受其邀致臣雖孱怯竊有未安昨因希顏宣旨却迴已與趙憬等同附口奏展轉申吐慮多闕遺臣更通夕詳思恐亦



無易於此不勝拳拳愚懇謹復密啓以聞如蒙聖恩察  
納臣即與趙憬等商量應須處置事宜具作條件聞奏  
儻後事有愆素臣請受敗撓之罪

德宗初置六統軍視六尚書以處罷鎮者相承用麻紙  
寫制時竇文場為護軍中尉諷宰相比統軍降麻翰林  
學士鄭絀奏曰故事惟封王命相用白麻今不識陛下  
特以寵文場耶遂為著令也上乃謂文場曰武德貞觀  
時中人不過員外將軍衣紩者無幾輔國以來始隳制

度朕今用爾不謂無私若復降麻天下必謂爾脇我為之矣文場叩頭謝上謂綰曰宰相不能違拒中人朕得卿言方寤耳

憲宗時翰林學士李絳上奏曰臣謹案守謙密言聖恩商量以昭義兵馬使烏重衡部署軍中事不獲已須與節度使者臣竊以此處置實非所宜比者以從史受命不由朝廷遂至生彼邪心致茲惡跡今重衡驅逐從史忽領旌旄兩河聞知必生怨望謂陛下密以官爵誘其

將校逐其主帥人情雖愜國體已傷若以重衡主兵勢  
須便與即是威福不在朝廷於事體之間與從史何異  
議者若云重衡見主權必不受制臣觀事勢實恐不然  
何者伏緣從史懷惡蓄奸罔上違命所以重衡得仗義  
獻款以順為名其衆遂伏今重衡若不顧憲章以力取  
位即其同列寧息偏辭儻失衆心前事豈遠以此事理  
必無異圖縱軍中有狀請與重衡此時之事必非忠心  
其流輩既多當不願重衡獨得別與一鎮少愜衆心伏

望聖恩先令密諭重衡授以河陽節度使除元陽澤潞  
節度使則人情大伏國體得全且重衡忽自軍將校授  
以河陽校於行間恩生望外豈於此際更有遲迴棄義  
虧忠遺福取禍雖至愚下亦必不然元陽功效素高公  
望又積澤潞接近久亦承風今若除授便徑入潞府慰  
勞將士家口卹其貧乏各使安存三軍聞知自然感悅  
重衡既得方鎮元陽又愜人心如此處置必無差誤機  
事可惜實所痛心威柄一失豈可復得伏望聖恩不以

臣愚昧特賜省覽斷自宸慮成此聖功輒敢獻陳

憲宗時河東王鐸將加平章事左拾遺白居易以為宰相天下具瞻非有重望顯功不可任按鐸誅求百計不卹彫瘵所得財號為羨餘以獻今若假以名器四方聞之皆謂陛下得所獻與宰相諸節度私計曰誰不如鐸爭裒割生人以求所欲與之則綱紀大壞不與則有厚薄事一失不可復追

宣宗時中書門下奏諫官闕員請補上曰諫官要在舉

職不必人多如張道牛叢趙璘輩數人使朕日聞所未聞足矣久之出叢為刺史入謝上賜之紫叢曰臣所服緋刺史所借也上遽曰且賜緋上重惜服章有司常具緋紫衣數襲從行以備賞賜或半歲不用其一故當時以緋紫為榮上重翰林學士然遷官必校歲月以為不可以官爵私近臣也

宣宗嘗敕補醫工劉集為場官鹽鐵轉運使柳仲郢上言曰醫工術精宜補醫官若委任銅鹽何以課其殿最

且場官賤品非特敕所宜親上遽賜絹遣之他日見仲  
郢勞之曰卿論劉集事甚佳上嘗有疾醫工梁新治之  
良已自陳求官但敕月給錢三十緡而已

時蔣伸從容言於上曰近日官頗易得人思徽倖上驚  
曰如此則亂矣伸對曰亂則未亂但僥倖者多亂亦非  
難上稱歎再三曰異日不復得獨對卿矣伸不諭尋拜  
伸為同平章事

懿宗時優人李可及能新聲自度曲辭調悽折同昌公

主喪畢帝與郭淑妃悼念不已可及為帝造曲曰歎百  
年教舞者數百皆珠翠祿飾刻畫魚龍地衣度用繒五  
千倚曲作辭哀思裴回聞者皆涕下帝以為天下之至  
悲可及憑恩橫甚帝欲擢為威衛將軍中書侍郎曹確  
諫曰太宗著令文武官六百四十三謂房玄齡曰朕設  
此待天下賢士工商雜流假使技出等夷止當厚給以  
財不可假以官與賢者並肩立同坐席也文宗欲以樂  
工尉遲璋為王府率右拾遺竇洵直固爭卒授光州長



史今以可及位將軍其如太宗之令何臣以為不可帝  
不聽

宋真宗即位初右司諫孫何上言曰伏見國家撫有多  
方並建衆職外則郡將通守朝士代行闕征權酷使者  
兼掌下至幕府職掾之微或自朝廷選補而授用人既  
廣推擇難精貢部上名動踰千計門資入仕亦及百人  
稍著職勞即升京秩將命而出冗長尤多每躬祀園丘  
誕敷霈澤無賢不肖並許敘遷至使評事寺丞纜數載

而通閩籍贊善洗馬不十年而登臺郎竊計今之班簿  
臺省宮寺凡八百員玉石混淆名品猥濫異夫虞書考  
績周官計治之法也有唐舊制郊禋慶宥但進階勲而  
已今若十年之內肆赦相仍必恐京僚過於胥徒朝臣  
多於州縣豈惟連車平斗之刺亦有敗財假器之失况  
祿廩所賦皆自地征所來須從民力何必空竭公藏附  
益斯人已授者朘削既難未遷者防閑宜峻古人所謂  
損無用之費罷不急之官正在此也伏願特降詔書自

今郊祀羣官一例不得遷陟必若績用有聞才名夙著  
自可待之不次豈俟歷階而升至於省併吏員上繫與  
奪時左司諫耿望亦以為然故咸平二年親郊止加階  
勲命有司考其殿最而黜陟之然三年差遣受代率皆  
考課引對多獲進改罕有退黜而官籍浸增矣

真宗時右正言夏竦進策曰臣聞周官曰以賢制爵則  
民慎德以庸制祿則民興功蓋爵以待賢祿以待庸賢  
不及爵爵非其賢則民慢庸不及祿祿非其庸則民情

嫚則廢德惰則無功故先王重車服慎名器崇德報功以教天下國家鑒三代典章采漢唐故事文質彬彬不遠中道在於授受猶有所疑何則王者撥亂反正自家刑國賢哲並起攀龍附鳳及其功成治定猶議賢而封計庸而賞豈有守文之君應天承祖恭嗣皇器而藩邸臣僕驟升清貴若師傳之官贊佐之吏輔翼之功宜被寵耀而鞭綏之御導從之隸競乘軺車爭受命服庶官恐懼號為隨龍歲月之間遷擢非次以新間舊頗為無

謂昔仲叔于奚請繁纓以朝仲尼曰惜也不如多與之  
邑唯器與名不可以假人其是之謂歟伏願陛下崇不  
諱之德采狂瞽之議改立明制垂法萬世使日月之光  
流被子孫

竦又進策曰經國以體馭賢以爵國以體立必也宏遠  
賢以爵貴無或僭濫體國不大則制度叢脞爵賢不正  
則服位陵替仲尼曰唯天為大惟堯則之大體之謂也  
又曰惟器與名不可以假人正爵之謂也故善為國者

存其大體則削其叢陞用其正爵而去其陵替然則大  
中之道行於典憲矣國家誕膺駿命奄有萬國稽古垂  
法彝倫攸敘然承唐氏亂離之後撥五代紛競之基冗  
制因緣或未全去臣聞身被命服即為王臣除官授職  
必聞賜誥豈有卑品之官州縣之職將拜絲綸之命乃  
輸綾紙之錢有識之徒誰不堙鬱況軍國之用動以萬  
計府藏之實何俟於此忍使惠之王澤而責之泉布又  
聞唐室衰弱兵在節鎮麾下從吏官皆假版皇家受命

政出天子州郡職員因循舊式豈有笞撻之吏輿阜之  
役階敘銀青銜稱檢校或兼烏府之官或假青宮之秩  
禮制之間無乃僭矣惠愛之道在於此乎誠當特降詔  
書並削冗事諸如此比一切刊正書之信史垂耀百代  
詩云周雖舊邦其命維新

仁宗景祐三年右司諫韓琦上奏曰臣伏聞寒暑順則  
歲功成賞罰明則君柄重故王者興化立政動法天道  
必功而議賞必罪而行罰若春夏之生殖秋冬之肅殺

物無不從也苟異於是猶當寒而燠當燠而寒物無不  
違也善為國者能執其中以馭天下則堯舜之盛可得  
齊焉臣材朽職近猥叅諫諍之末有所聞見每願竭肝  
膈上補醇治少副陛下隆寬廣問之意故莫敢容默于  
位以負甄擢惟陛下矜而察之臣伏見近者睦親宅告  
成自提舉臣寮而下有詔增秩用勸勞者入內侍省  
副都知張永和實搃其事故有違領團練之命逮夫同  
列旋亦推恩當時公言共謂非是蓋以其一官之故而



衆人蒙賞故也或以謂省局之內官次相妨因而敘遷未甚為害臣是以不敢遽有論列今聞前省都知以降又復優加使額臣竊觀衆論益以懷疑誠以勸沮之方爵賞為大若匪問其官簿疇以年勞則必顯著功籍時申寵拜或不由是皆涉無名故書曰官不及私昵惟其能爵罔及惡德唯其賢昔衛人賞于奚以邑辭請繁纓以朝而許之孔子聞之曰惜也不如多與之邑惟名與器不可假人東漢館陶公主為子求郎明帝不許賜錢

千萬而曰苟非其人民受其殃是以難之斯皆古先哲  
王謹刑罰之源也伏望陛下念恩私於近則勞臣必怨  
失知其揀則大猷日新特示至公亟行追寢使褒一功  
而天下勸正一罪而天下服為善者彌思於勵行不仁  
者更務於革心式臻嘉靖之風永協大中之化

慶歷三年知諫院歐陽脩上奏曰臣伏見國家每出詔  
令常患官吏不能遵行不知患在朝廷自先壞法朝廷  
不能自信則誰肯信而行之然多因小人僥倖而不知

抑絕所與之恩雖少所損之體則多臣聞去年十月中  
曾有臣僚上言乞今後大臣廝僕不得奏薦班行勅旨  
頒下纔三四月已却用呂夷簡僕人袁宗二人為奉職  
夷簡身為大臣壞亂陛下朝政多矣苟有利於其私雖  
敗天下事尚無所顧況肯為陛下惜法但朝廷自宜如  
何今一法纔出而大臣先壞之則其次臣寮僕人豈可  
不與不與則是行法有二與之則近降勅旨今後又廢  
有司為陛下守法者不思國體但徇人情或云二僕得

旨與官在降勅前奈何授官在降勅後凡出命令本為  
釐革前弊法家以後勅衝前勅今袁宗等雖曾得旨而  
未授命間已該新制自合釐革夷簡不能止絕而恣其  
僥倖朝廷又不舉行近勅而自隳典法今後詔令何以  
遵行其袁宗等伏乞特追奉職之命別與一軍將之類  
名目足示優恩不可為無功之臣私寵僕奴而亂國法  
八年侍御史知雜事何郊上奏曰臣伏聞閣門近進四  
日紫宸殿宴人使坐圖入內都知王守忠亦在楊景宗

下預坐臣訪得閣門儀制內外臣僚帶刺史節度觀察  
留後並係遙郡不得正官班列以至賜與進獻頗甚殊  
絕唯正刺史以上凡遇宴會坐次方許列在殿上今若  
以守忠帶兩使留後便依正官例升殿與宴即是自今  
內外臣僚凡帶遙郡皆合上殿預坐啓僭壞法莫此之  
甚且朝廷儀品所以辨尊卑上下之分不可輕棄舊章  
以生紊亂況祖宗典法未嘗有內臣殿上預宴之事此  
弊一開所損不細伏望指揮下閣門速行改正一遵舊

制仍令今後遇有宴會臣僚職位不合預坐之人不得  
妄有陞進坐次所冀示朝廷紀綱之正戒人臣僭差之  
望

郟又上奏曰臣伏聞降勅命以昭宣使王守忠脩祭器  
物勞効特除景福殿使仍賜節度觀察留後月俸臣始  
初風聞內批指揮止授守忠宣慶使次日聞授節度觀  
察留後今雖節度觀察留後之命不行仍以月給賜之  
復遷改使名勞淺賞重中外之議頗不為允夫爵位之

設以待勞臣而勸忠義故賞之厚薄視功之大小歸乎  
不虛授而已至於舉一職領一事有所幹濟蓋人臣戮  
力之常分也以常分而受賞典已為過矣又厚焉適足  
以啓澆濫之源也且守忠之掌脩祭器亦人臣領一事  
戮力之常爾然陛下重宗廟之事以報其勞自昭宣使  
超授宣慶使恩賞之行不過不薄適其中也而守忠曾  
不滿意仍要君命夫以小勞職分之常而所求猶如此  
過當則後來有冒矢石捍邊寇之臣果有顯效則將何

爵賞以稱其意焉況內臣領遥郡祖宗之制止於觀察使然非積勞未嘗妄授今守忠雖不授兩使留後而得給其祿人情所希皆起於漸既得其祿必欲其官苟又從之是何位之不可求也夫事戒其始末猶不禁況不戒焉則弊將橫流矣其王守忠欲乞只依元降指揮授以宣慶使所有兩使留後俸料亦乞罷給陛下如欲優示寵待則乞厚以金帛賜之足為恩假至於爵祿公器不可輕授授之不濫則朝廷紀綱庶可存焉臣以空疎



獲備耳目遇事即言因無忌諱伏望聖朝特賜省納  
郊又上論兩府遷官疏曰臣等伏見前任兩府臣僚繼  
有除拜非復差功計勞特出一切恩命近時典故未見  
此比物議喧然不知其由夫爵祿固上所得專予以其  
可以厲世磨鈍使天下之人赴忠義立事功至於徇節  
捐軀而不自悔故古之王者至重至謹賞一人必使天  
下之人皆知以為當然不敢用為己私而輕天下之所  
重也今若授受之際皆出無名則何以勸有功有功者

不足勸是古之所重今便以為輕雖極顯官厚祿將無以磨礪天下而人人有覬覦徼幸之心復何所恃而為治哉況股肱大臣天下所望為表則者豈特以一官自私而不為國家惜大體臣等固知爵命之行必有遜而不受者伏望朝廷察臣等言稽之典故如今來例行除授事體有輕重必當即乞明示中外使灼然曉知若祇出一時之恩願下臣等章奏詢之公議儻以為然或難追寢前命因其表遜悉停過恩如此則上無虛授之譏

下有相遜之勸與其一舉兩失事相萬也臣等待罪言責不敢顧避緘默

皇祐二年知諫院司馬光上論麥允言給鹵簿狀曰昔仲叔于奚有功於衛衛人使之繁纓以朝孔子曰惜也不如多與之邑惟器與名不可以假人夫爵位尊卑之謂名車服等威之謂器二者人主所以保育其臣而安治其國家不可忽也今麥允言近習之臣非有元勳大勞過絕於人而贈以三公之官給以一品鹵簿其為繁

纓不亦大乎陛下雖欲寵秩其人而適足增其罪累也  
何則三公之官鼎足承君上應三台鹵簿者所以褒賞  
元功皆非近習之臣所當得者陛下念允言服勤左右  
生已極其富貴死又以三事之禮為之送終鼓吹簫鏡  
烜赫道路是則揚其僭侈之罪使天下側目扼腕而疾  
之非所以為榮也惟陛下御覽仲叔于奚之傳垂意孔  
子之言則知名器之重不可加非其人況唐制羣臣於  
國立大功者婚葬則給鹵簿餘不在給限伏望陛下追

寢前命其麥允言更不給鹵簿毋使天下之人竊指目  
以為朝廷過舉不勝幸甚

至和二年侍御史趙抃上言曰臣伏見近年朝廷非次  
除節度使宣徽使頗為煩數竊以二者使額在唐季則  
付與容易屬聖朝則授受艱難職任絕優事權實重臣  
僚設非勲舊名器安可輕假謂宜慎重賞格得以關防  
倖門須有定規庶禪至治臣愚欲乞指揮今後宣徽并  
節度使內文臣須是曾歷中書樞密院任用加之德望

為人推服武臣曾經邊鄙建立功業者方許除拜兼宣  
徽使元額只是兩員至如使相之任體貌尤重更當慎  
惜豈宜輕議嘗聞太祖皇帝朝命曹彬收復江南功成  
凱還雖賜與則多終不授彬使相臣以謂此等官職平  
時無故等閑除授臣僚亦以等閑得之不以為貴四方  
向去萬一有緩急事宜必有賢智豪偉之人為陛下制  
變禦侮立功立事當此之際朝廷行爵賞恩賚之議則  
以何官職處之久遠之制須今日思之重之惜之不可

不慎也伏望陛下特賜聖旨以臣所請付兩府議定執  
守施行上以遵祖宗之法下以重爵位之賞則中外幸  
甚

仁宗時監察御史傅堯俞上奏曰臣聞爵祿天下之砥  
石其所以礪世者非謂人人飽高爵而厭重祿也蓋必  
當其勞則天下知勸苟異於是雖窮極班品不能滿貪  
冒之心而但啓僥倖之路不能為勤瘁之激而徒樹營  
私之恩伏惟陛下留神而察之臣伏覩單州團練使劉

永年除齊州防禦使臣竊思永年進因恩澤未著續用於榮寵固已優渥況有舊條武臣正授已上不許無勞敘進若此官用久次能得則建節緣日月可取至於餘人不得援例此語尤為未允惟以庸制祿不當有引例之嫌既廢令假人安可杜拔茅之勢事體明著不為難曉豈有他日約束不能限永年而今日指揮可以塞來者乎是不足昭信天下益取輕耳臣恐緣此煩聖聰者衆陛下無以拒之近錢晦知代州亦未嘗改官不識永



年何以異於晦也伏望陛下追寢新命加慎名器使圖  
顯效然後遷擢則能者益奮而不能者知勉且俾條詔  
不為空文臣不勝懇激之至

堯俞又上奏曰臣近嘗論列劉永年無勞轉官乞行追  
寢至今未蒙施行臣聞爵祿天下之公器法令王者之  
大柄既不能以大柄自持而以公器私於人方復區區  
誠之以不得援例此臣所以大惑也借使私於永年衆  
人可隔於陛下平均之德固已虧損況衆人之不可隔

乎苟不復計校率以例遷則天下之公器如何哉方今  
事不責實貪競尚多不作法以抑僥倖迺廢陛下成法  
啓僥倖而為之地臣所以尤為陛下惜之且法自永年  
始而廢於永年又可恠之甚者夫置言事之官使拾朝  
廷之闕古惟恐其不言今乃不然平居議論率常十格  
七八若壞法濫官章明較著如是之不疑者以列於陛  
下又置而不聽則安用言事者乎惟陛下必垂省察

英宗治平二年龍圖閣直學士何郊上奏曰臣聞聖人

之養賢也能品其德能量其才能授以官於是分之為  
三上賢使之為三公次賢使之為臺諫監司下賢使之  
為守令所以寓權而悅之也於是為之宮室輿馬以養  
其體為之旌旗冕弁以養其貴為之鐘鼓琴瑟以養其  
樂為之弓矢斧鉞以養其威然而不可以私授惟其德  
惟其才而已矣苟授非其人則覬倖之端啓有小人者  
得之則胥効犇嚮而求之若固有於已寔以成俗人人  
皆以取之甚易而無難矣一旦聖人將革其弊而廢黜

之莫不怨望盈耳是非小人之過其過在於人主授之輕也人主不禁之於前而止於後蓋無及已嗚呼用人之際可不謹歟昔衛以鞶纓授仲叔于奚仲尼非之館陶為子求郎漢明拒之知名器如此其重也今陛下紹德業之崇卜基圖之永大設綱紀思合天人行於前必慮其後圖於始必全於終惟是選用之艱尤所可重品其德然後授其官量其才然後定其位使朝廷上下公卿大夫皆得以服其榮安其分士無覬覦職無虛授

則天下官冗之弊息名器之用正夫以大理評事之卑而太宗猶謂之清望官不以授伶人之子況其大者乎惟陛下重之

英宗時殿中侍御史范純仁上奏曰臣聞君之大柄在於刑賞賞不僭則為善者勸而下無覬覦之心罰不濫則為惡者懲而人無冤抑之患善為國者必慎於斯陛下臨御已來於刑罰固已慎矣而於濫賞之弊未聞更張近自兩月已來尤多輕授如待制龍圖脩撰之職相

次拜者幾十餘人豈必盡是賢才且復別無勲績但以一人擢用比之同列稍優則人人敎遷以足其希望之意務為姑息如止兒啼輕爵濫恩無甚於此伏惟祖宗之制尤慎寵名至於小官未嘗輕授況於近侍之職豈容什伍而進哉伏望聖慈詔中書門下凡經筵雜學士待制脩撰等職並依內外制修注體例各立定員數必須才德兼優或聖意東擢或委以重任或別立事功仍俟闕員方許除授自餘不得進擬如此則得馭臣之道

革僥倖之風近侍得人名器增重

神宗時知諫院陳襄乞止絕權貴非次陳乞恩例劄子  
曰臣竊見近日臣寮并故臣寮之家陳乞內外親屬恩  
澤衝改已授差遣人員闕朝廷雖有先降指揮過一月  
之外不許衝改然所陳乞恩例名目稍多逐時中書樞  
密院不住於審官三班院流內銓取已使員闕差注終  
屬未便緣逐處待闕之人守候名次動經歲月泊至授  
下差遣出京待闕或已前去赴任却被衝改雖在遠方

不免依前再赴銓院別候闕次孤寒久旅之人寧不嗟怨朝廷既有恩例許令指射優便差遣已是優恩豈可更容衝奪已使員闕甚無謂也兼陳乞恩澤多是近上臣僚之家非理僥求因成體例攀援引寢不可革國家爵祿恩賞所以待賢能之士今惟以父兄親屬私恩陳乞使闕閤無功之人占奪優便差遣一切出於僥倖甚非至公之朝慎名重器區別能否之道也臣以為立法更弊必先自貴者始欲乞今後除前兩府出鎮與沿



邊安撫帥臣辟舉人依條施行及勞績酬獎堂除人許  
指射非次見闕外其餘乞先自兩府以至文武臣僚及  
分司致仕故臣僚之家如合陳乞弟姪兒男及異姓骨  
肉恩澤并奏薦人差遣等並令一例於季闕已前一月  
內指射合入優便之處依例等待即不得臨時陳乞非  
次見闕及衝改已授差遣人員闕庶使權貴絕僥求之  
望寒士無被奪之患而稍獲均濟矣

神宗即位御史中丞司馬光論王廣淵劄子曰臣前兩

次上言王廣淵傾巧奸邪乞盡奪去職名與遠地監當  
近聞本人帶舊職知齊州仍賜章服如此乃是賞之非  
黜之也曷使廣淵自改京官以來謹身守分不為奸諂  
以至今日不過作第二任通判今所得乃如此豈可謂  
為奸諂無益哉孔子稱唯器與名不可以假人今之章  
服所謂器也職名所謂名也二者皆無用之物然而天  
下貴之者為其非賢才則不能得之故也唐宣宗重惜  
章服不輕以與人有司製緋紫衣以備賜與經年不用

三兩領故當時服緋紫者人以為貴夫名器者譬如珠玉若使之易得如瓦礫尚安足貴乎近歲兩次覃恩賜緋紫者已為汎濫今又如陳鑄王廣淵輩皆賜章服是使今後受賜章服者皆以為耻不以為榮也且陛下使廣淵出補外官者必已知其姦邪之迹也今又復以職名章服寵之是勸人使效廣淵所為也臣竊恐非國家之福伏望聖斷依臣前奏盡奪去廣淵職名并此來章服與遠地監當使賞善罰惡皦然明白

歷代名臣奏議卷一百九十七